


# KOBÓTOLA BIKUKE YA MOYINI

 Mbote na bino nyonso. Esengo ya kozonga lisusu na ntongo oyo na tabernacle, mpo na kobondela mpo na babeli lelo. Ezalaka ete, na momesano, tomekaka koya awa, mbala na mbala, mpe—mpe kobondela mpo na bato oyo bayáka longwa na bisika ndenge na ndenge, mpo na libondeli.

Sikawa, tokokende kala mingi te, sikawa, mpop na mayangani ya Californie ná Libongo ya Westi. Mpe tozali mpenza kosenga mabondeli na bino, ete Nzambe ya Lola áyokela biso mawa kuna mpe ápesa biso mayangani ya malamumu mingi.

Nauti kokóma, lobi eleki, to lobi na butu makasi, kutu. Lobi ezalaki moko na . . . Ee, liboso na lobi eleki, ná lobi eleki, ezalaki moko na mikolo oyo nakobosana te na bomoi na ngai. Kuna, nayebi koleka bato mibale, to misato, awa na kati, baoyo bazalaki banzeneneke na ndenge Nkolo akitaki, lobi eleki. Likambo moko ya monene, ya nkembo esalemaki, oyo nazali na ntango ya koyebisa bino yango te na ntongo oyo. Kasi ntango mosusu mokolo ya Lomingo na ntongo, liboso tókende, ntango mosusu nakozala na ntango ya—ya koyebisa bino yango, na kati ya Liteya. Soki Nkolo alingi, nakoya awa, ata mpo na kobondela mpo na babeli, mokolo ya Lomingo na ntongo. Tolingi kolongwa, ntango mosusu pene na midí, soki ekokoka, mpo na mayangani ya San Jose, na San Jose, na Californie. Mpe soki bozali na bato kuna, na Libongo ya Westi, ezali ete, tobanzi, ekozala ntango mosusu ngonga oyo nazelaka, ntango nyonso oyo, ya mbongwana na lotómo na ngai oyo ezali koya. Mpe ekomi mpenza pene, nakanisaki ete ekosalema lobi eleki. Mpe nabanzi ete ekosalema mbala moko mpenza, mpe ekozala na mosika koleka nyonso oyo totikálá komóná to koyóká, ata bongo. Sikawa, bóbosana te, ezali YANGO ELOBI NKOLO. Bomoni? Na bongo, tozali mpenza kozela yango, ata na ntango nini.

Mpe tosengeli kosala liyangani sikawa na mabelé ya Foire. Nabanzi ete ezali bongo, boye te, Gene? Na mabelé ya foire na San Jose, na Californie. Ekozala mayangani ya mikolo zomi, kobanda mokolo mwa 20, kino na oyo ya 29, na—na San Jose. Sikawa, bózala kokanisáká biso mpe bóbondelaka mpo na biso.

Sikawa soki tobimi na ntango malamumu, totikali na ngonga pene na moko na ndambo sikawa, tolingi kobanda liyangani na biso ya kobondela mpo na babeli mpe koteya Liloba. Na ntongo oyo, naponi eteni ya Makomi moko ya moke, bisika mibale na Biblia, ya kolobela.

Kasi liboso tóloba, tógúmba mitó mwa moke, mpo na kobondela.

<sup>2</sup> E Nzambe oyo atóndá na ngolu, tobelemi na komikitisa na ngwende na Yo ya ngolu na ntongo oyo, lokola bana oyo balóngóbáni te, kasi toyei ná kondima ya peto epai na Nzambe, yango epesámelaki biso na Molimo Mosanto, ná Bozali na Ye ya ntango nyonso elongo ná biso, mpe na nzela ya elaka ya Nkolo Yesu, ete soki toyei na komikitisa mpe tosengi eloko moko na Nkombo na Ye, tokopésamela eloko oyo tosengi. Na yango, totálelaka makoki na biso moko te, mpo tozali na yango ata moko te, kasi totálelaka nde makoki ya Kalvári, epai ngolu na biso epesámelaki biso ofélé na nzela na Mwana na Nzambe. Mpe tokoki mpenza te kokanga mpisoli oyo etangaka kino na kingo na biso, ntango tokanisaka ete tozali bato oyo balongobani te, mpe lolenge oyo, na ngolu na Ye, Asalaki yango mpo na biso kuna na Kalvari, mpo tókoka komemama mpenza mpembeni na Nzambe, mpe tózala na bondeko mpenza. Sikawa tozali bana na Ye ya mibali mpe ya basi.

<sup>3</sup> Mpe toyei na ntongo oyo, Nkolo, na nsé ya mwa motóndo oyo, mpo na komípesa mobimba, mpe mpo na mosala, koyamboláká masumu na biso, ná—ná kokúmbamela Nzambe. Totii motema ete Okozala elongo na biso mpe Okopesa biso lisosoli ya molimo ya boyei na Yo oyo ekómi pene, mpo tókoka kolengela mitema na biso mokolo na mokolo mpo na likambo monene wana, oyo bato bazelaka yango mibu nkóto na nkóto. Sólo mpenza, bokeli mobimba ezali kokimela mpe kolela mpo na kokangolama. Mpe milimo na biso na kati na biso, Nkolo, ezali ntango nyonso kotátola, ete: “Tozali baleki nzela mpe bapaya, mpe oyo ezali efandelo na biso te, kasi tozali kolúka Engumba moko, oyo Motongi mpe Mosáli na Yango ezali Nzambe.” Tozali kozela ntango yango ya nkembo, oyo ezali koya.

<sup>4</sup> Nkolo, tokozala komíkanisela ete mayángani oyo, ntango tosangani awa, tóbóndela mpo na bana na Yo oyo bazali na bokono ná mawa. Mpe tosengi ete Ókutana na biso lelo na lolenge moko libanda na momesano, mpo na kobikisa makono ná maladi nyonso katikati na biso. Mpe ekoki kosalema, Nkolo, ete elaka oyo nautaki kolobela, ndenge nakutanaki ná Yo kuna lobi eleki, kaka nsima na ntongo kotána, ná lolenge oyo Otatolaki yango mbala na mbala. Mpe tomiyoki ete ngonga yango ekomi mpenza pene. Mpe tika ete lelo ézala mokolo yango, Nkolo, oyo ekosalema, oyo Okobóngola lotómo, Nkolo, mpo ékóma eloko oyo ekozala na ngolu koleka mpo na bato na Yo.

<sup>5</sup> Sikawa, Tata Nzambe, tolingi kobondela bobele mpo na baoyo bazali awa te, kasi mpo na baoyo bazali na mokili mobimba, oyo bazali na bosenga, na molimo mpe na nzoto. Pesa bango, E Nkolo, mposa ya mitema na bango, mpo bana na Yo bazali na bitumba na mikolo oyo. Konyokwama ya monguna ekómi makasi mingi, kasi Yo ozali na makasi koleka. Mpamba te ekomami: “Ye Oyo azali kati na bino azali monene koleka ye oyo azali na mokili.” Na nzela na yango nde tolóngaka. Lobá

na biso na nzela na Liloba na Yo oyo ekomámá. Mpe ntango tokobima na ntongo oyo, tika ete tóloba lokola baoyo bautaki na Emaus: “Mitema na biso ezalaki kopela móto kati na biso te, wana Azalaki kosolola na biso na nzela?” Tosengi yango na Nkombo na Yesu, Oyo apesaki elaka yango. Amen.

<sup>6</sup> Nazali kotángá sikawa na bisika mibale na Buku ya Genese. Moko na yango ezuami na mokapo ya 24, kobanda na molongo ya 56, etángi boye.

*Nde azongisaki na bango ete, Bópekisa ngai te mpo ete Yawe asili kolóngisa mobembo na ngai; bópesa ngai nzela ete názonga na nkolo na ngai.*

*Balobaki ete, Tokobianga moseka mpe tokotuna ye.*

*Babiangaki Lebéka mpe balobaki na ye ete, Olingi kokenda elongo na mobali oyo? Ye alobaki ete, Nakokende.*

*Bongo batindaki Rebekah mosika ná ndeko na ye ya mwas- . . . ndeko na bango ya mwasi, mpe moombo mwasi na ye mpe moombo ya Abalayama, . . .*

*Bapámolaki Lebéka mpe balobelaki ye ete, Ndeko na biso, ójala mama na nkóto mbala nkóto jomi, mpe bana na yo bábotola bikuke na bayini na bango.*

<sup>7</sup> Mpe na Genese 22, molongo ya 15, totángi.

*Mpe mwanje na Yawe alobaki na Abalayama mbala na mibale longwa na likoló ete,*

*Yawe alobi ete, Nasili kokata ndai na nkombo na ngai mpenza, mpo ete osili kosala oyo, mpe yo oboyi ko- . . . kopesa mwana na yo te, mwana na yo na likinda:*

*Nakopámola yo solo mpe nakofulisa bana na yo lokola mióto na . . . likoló, mpe lokola zelo . . . na libongo na mbu; bana na yo bakobótola bikuke na moyini na bango;*

*Mabota nyonso na nsé bakopambolama mpo na bana na yo; mpo ete yo osili kotósa mongongo na ngai.*

<sup>8</sup> Sikawa tika ete Nkolo ábakisa mapamboli na Ye na litángi ya Maloba na Ye. Sikawa nalingi kozua, soki esengeli kozua motó ya liteya, liteya na ngai na ntongo oyo, liboso, ezali: “Komekama liboso na bikuke ya elaka.” Mpe motó ya liteya yango ezali: *Kobótola Bikuke Ya Moyini.*

<sup>9</sup> Nzambe azalaki komeka nkóko, mpo Apésáká ye elaka. Mpe ntango Nzambe apési elaka, Alingaka kondimisama ete moto yango alóngóbani na elaka yango, liboso Ákokisa likambo oyo Alobáki to oyo Alaki. Boye Abraham asiláká kopesamela elaka ete na nzela na momboto na ye nde mokili mobimba ekopámolama, ete akobóta mwana mobali. Mpe, mwana oyo, uta na ye Momboto moko ekobótama, oyo ekopámola mokili

mobimba. Mpe Abraham, ntango elaka epesamelaki ye, azalaki na mibu ntuku nsambo na mitano; mpe Sara, mwasi na ye, azalaki na mibu ntuku motoba na mitano. Kasi Biblia eyebisi biso ete Abraham abetaki ntembe te na elaka ya Nzambe, na kozanga kondima, kasi akómaki na makasi, kopesáká nkembo na Nzambe. Mpe Nzambe, mbala na mbala, azalaki komeka ye, kasi autaki kokóma na momekano wana ya nsuka, liboso lipamboli yango ékokisama.

<sup>10</sup> Ezalaka mpe bongo na Mombóto nyonso ya Abraham. Nzambe nde apésaka biso momekano ya nsuka wana, kaka liboso Ápesa elaka yango. Mpe soki ekokaki kosalema, nalingaki koloba likambo moko awa, ya ngai moko, kasi nakosala yango te. Momekano ya nsuka wana, mpo na komóna lolenge nini okosala mpo na yango. Ntango Apesaki Abraham momekano oyo, Amonaki ete Abraham atelemaki kaka ngwi lokola na ebandeli. Elingaki kozala lipamboli monene na ntongo oyo, soki biso baoyo toyambi elaka na Ye ya lobiko na nzoto tokotelema ngwi ndenge tosalaki mpenza ntango totélemaki awa mpe toyambaki yango. Ata monganga alobi eloko nini, télema kaka ngwi.

<sup>11</sup> Mpe ntango asalaki likambo oyo, mpe aboyaki ata moke te kopesa mwana na ye kaka moko wana, kasi abelemaki mpo na kozindisa mbeli na ntólo ya Yisaka, mpo na kobebisa litatoli na ye. Asilaki kotatola na bato nyonso oyo ayebaki na mokili ete akobota mwana mobali yango. Na nsima, ntango mwana yango ayaki, eséngamáki na ye áonga na ebandeli, mpe áboma elikia bobele moko oyo azalaki na yango mpo litatoli na ye ékokisama. Mpe ntango Nzambe amonaki ete azalaki sémbó na kondima oyo azalaki na yango epai na Nzambe, Nzambe abwakaki miso longwa na lola mpe Alobaki: “Nasili kokáta ndai na Ngai moko ete Nakopambola yo mpe koyíkanisa yo, mpe momboto na yo ekobotola ekuke ya moyini na ye.” Oyo nde elaka mpenza!

<sup>12</sup> Mpe Rebekah, oyo alingaki kokóma mama ya mwana oyo alobelamaki, alakamaki mpe azelamaki, ntango asengelaki koleka na momekano ya nsuka, ya mopaya oyo ye atikálá komona te liboso, amónáká bobele misala ya Molimo Mosanto. Mpe ntango baboti na ye bakokaki mpenza kozua mokano te, soki ye asengelaki kolanda mopaya yango to te, mpo na kokóma mwasi ya mobali oyo atikálá komona te, alekaki na momekano ya nsuka. “Tokobenga elenge mwasi yango mpe tokotika ye áloba. Tokoyoka na monoko na ye soki akokende, iyo to te.”

<sup>13</sup> Esalemaka lolenge wana mpo na Momboto nyonso ya Nzambe. Esengeli kouta na monoko na yo. Nzambe alingaka ete bino moko bóloba yango.

<sup>14</sup> Boye ntango alekaki na momekano, atatábanaki ata miniti moko te. Alobaki: “Nakokende.” Nasepelaka na yango. Ezali te: “Tika ete názua mokano. Tika ete náyekola yango malamú.”

Andimisamaki na mobimba. Wana nde bato oyo Nzambe akoki kosalela, ntango ondimisami na mobimba ete Nzambe akobatela elaka na Ye. Alobaki: “Nakokende.”

<sup>15</sup> Mpe bandeko na ye, na ntango yango, bapakolamaki mingi, ntango mosusu bayebaki yango te, kasi basakolaki, wana batielaki ndeko na bango ya mwasi maboko, mwana na bango ya mwasi; elenge mwasi kitoko, Moyuda yango, ntango bamatisaki ye likoló na kaméla mpe batindaki ye na mboka mopaya, katikati na bapaya. Kasi Eloko moko ezalaki likoló na bango. Balobaki: “Tika ete momboto na yo ébotola ekuke ya moyini na bango. Kómá mama ya bankóto na ba-milio.”

<sup>16</sup> Mpe, lelo, libota ya bato yango mpe libota na Nzambe etondi longwa na mbu moko kino na mbu mosusu, na mokili mobimba. Na mokolo ya lisekwa, bakozala lokola minzoto ya Likoló, wana ba-pole na kongenga wana ezuaka bisika na yango, ntango elekaka na likoló. Mpe ntango bakoya bakozala lokola ba-mbu pene na . . . tó zélo na libongo na mai-na-mbu. Ekozala bankóto na ba-milio na bango.

<sup>17</sup> “Momboto na yo akobotola ekuke ya moyini na ye.” Yango nde elaka ya Nzambe alapeláki na ndai: “Momboto ya Abraham.”

Na bongo, na nzela na Molimo Mosanto na Ye, lokola mama asengelaki mpe kozala eteni ya mwana, mpamba te bazali eteni ya nzoto. Na bongo, Molimo Mosanto oyo esalaki na nzela na bato oyo, alobaki: “Ye . . . Tika ete Momboto na yo ébotola ekuke ya moyini.” Na bongo, Nzambe akátaki ndai ete Akobótola ekuke ya moyini, na bongo, likambo yango etii Lingomba ya Nzambe na bomoi na esika nini?

<sup>18</sup> Tozali Momboto ya Abraham. Mpamba te, biso, lokola tokufi kati na Klisto, tozali, toláti Momboto ya Abraham mpe tokómi basangoli ya libula elongo na ye, na elaka yango moko oyo epesamaki na ndai. Tozali Momboto ya Abraham, mpe tozali basangoli ya libula ya bilaka nyonso oyo epesamelaki ye. Kasi ntango komekama eyáka, na esika wana nde tokwéyaka. Kasi nandimaka te ete Momboto ya solo ya Abraham ekokweya. Bakotelema mpenza ngwi mpe bakozala sémbó lokola Abraham.

<sup>19</sup> Sikawa tomoni ete Nzambe akoki koloba likambo moko te to—to kopesa elaka moko te kozanga ete Ákokisa yango. Asengeli kosala bongo mpo na kozala Nzambe. Mibu ebele na nsima, ntango bato yango moko, libota ya elaka, momboto ya Abraham, bazalaki na mobembo, kokendéké na—na mboka ya elaka, ezalaki na ekuke moko oyo etélemelaki ye, ezalaki ndeko na ye moko, Moaba, oyo alobaki: “Okoleka na mboka na ngai te. Nakolandela yango ete óleka na mboka na ngai te.”

<sup>20</sup> Ye alobaki: “Soki bangombe na biso balei matiti na yo to soki bameli mai na yo, tokofúta yo mpo na yango.”

Kasi alobaki: “Okoleka na mboka oyo te.”

21 Kasi elaka ya Nzambe ezalaki kaka sémbó. Boye, bakendeki kozua mosakoli na bango, Balame, mpe bamemaki ye mpo álakela bato yango mabe. Alobaki boye. Bamekaki kolakisa ye ngambo ya mabe koleka ya momboto oyo epambolámá, kasi Nzambe alakisaki ye ngambo na yango ya malamú koleka. Alobaki: “Moto oyo akolakela Yisraele mabe akolakelama mabe, mpe moto nyonso oyo akopambola ye akopambolama.” Mpe bipekiselo elongwaki mpe Yisraele balekaki na bitando yango. Nzambe alakaki ete akobotola ekuke ya moyini na ye.

22 Na nsima, nsima na mibu ebele, moto moko ayaki, nkombo na ye Daniele, azalaki na molongo ya Momboto Mokonzi yango, mpe na molongo ya bilaka, mpo azalaki Momboto ya Abraham. Mpe Nzambe aponáká ye liboso na kozalisama ya mokili, mpo na kozala mosakoli na Ye, mpe abikaki malamú mpe abikaki na bosembo. Mpe ata na mboka mopaya, akánáká na motema na ye ete: “Nakomiyeisa mbindo ná bango te.” Oyo wana ezalaki Momboto ya solosolo ya Abraham; azalaki kofanda na mboka ya ndenge mosusu, azalaki kobika elongo ná bato ya ndenge mosusu, kasi ata bongo atelemaki ngwi na elaka wana. “Nakomiyeisa mbindo elongo ná bango te. Nakotikala kaka sémbó.”

23 Nzambe alekisaki ye na momekano ndenge Asáláká na tata na ye, Abraham. Mpe mokonzi alobaki: “To okozala lokola moko na biso mpe okosámbela ndenge biso tosámbelaka, to ngai nakobwaka yo na libulu oyo etondi na bankosi oyo bazali na nzala.”

24 Daniele, lokola Abraham tata na ye, alobaki: “Okoki kobwaka ngai na libulu ya bankosi, kasi nakogúmbamela ata moko ya bikeko na yo te. Nakondima losambo na yo ya mimesano te. Nakotikala kaka sembo na Jehovah.”

25 Na ntango yango nde momekano ya nsuka eyaki. Mokonzi akokisaki elaka na ye mpe azuaki mosakoli yango, to atindaki ete bázuá ye mpe bábwaka ye na libulu ya bankosi. Mpe ntango bankosi yango, moyini ya Daniele, bayélaki mosakoli, Nzambe akokisaki elaka na Ye. Abótólaki ekuke ya moyini na ye. Nzambe atelemisaki Mwanje moko wana, liboso na bankosi yango, mpe abótólaki ekuke yango. Nzambe abatelaka elaka na Ye. “Akobotola ekuke ya moyini na ye.” Nzambe alobaki bongo.

26 Na bongo bato misato mosusu bazalaki kuna, oyo basilaki bango moko kokáta ndai ya bosembo na ntina yango, oyo bazalaki mpenza Momboto ya Abraham, mpe ezalaki Shadrake, Meshake ná Abedenego, bango mpe balekaki na momekano. Balobaki: “Soki boboyi kogúmbama ntango bokoyoka nzenze kobéta mpe bakelelo koyúla, soki bogúmbami liboso na losambo na biso te, mpe bokabwani te na makambo oyo—oyo bolobelaka! Mpe bozali na libunga, ata bongo. Losambo na bino ezalaka kaka lokola oyo ya bato mosusu nyonso.” Toyokaka likambo yango

ntango nyonso te? Kasi lo—losambo ya Yesu Klisto ezali ndenge mosusu. Nguya ya lisekwa na Ye ezali ndenge mosusu. Tozali bato ya ndenge mosusu, libota ya ndenge mosusu, bonganga ya bokonzi. Nzambe nde asalaka bokeseni.

<sup>27</sup> Kasi ntango balobaki: “Bosengeli kokóma moko kati na biso.” Elingaki kozala mabe te mpo na Shadrake, Meshake ná Abedenego soki balingaki kokóma moko na bango, kasi balingaki ata moke te kokóma moko na bapaya wana. Sikawa, balobaki: “Soki bosali yango te, tozali na ekuke moko awa ya litumbu na móto, oyo tokoki kofungola mpe kobwaka bino na kati na yango, mpe elingaki kozala malamú mpo na bino bókóma moko na biso.”

<sup>28</sup> Bamikaniselaki elaka. Bamemaki bango kino na litumbu na móto. Ntango bafungolaki ekuke mpe babwakaki bango na kati ya móto, moyini na bango, oyo alingaki kotumba bango, babótolaki bikuke ya moyini na bango. Nzambe atindaki Mwana na Ye na kati ya móto yango, akómisaki makala yango mpío, mpe asololáki ná bango ntango bazalaki kuna na kati. Elaka ya Nzambe ekokisamaki solo. Babótolaki ekuke ya moyini. Bamekamaki liboso, na nsima, babótolaki ekuke ya moyini.

Yesu nde Moto apésaki elaka yango te? “Soki obetisi moko na bana mike oyo libaku, eleki malamú ete bákangisa yo na kingo libanga oyo baníkaka na yango mbuma mpe bázindisa yo na bozindo ya mbu. Bómeka ata kobetisa libaku te na bana mike oyo bandimeli Ngai. Mpe bilembo oyo ekolanda baoyo bakondimela Ngai.”

<sup>29</sup> Asalaki bokeseni. Atalisaki polele banani bandimaki mpe banani bandimaki te.

Bitonga ya bato ezalaka ntango nyonso misato, ezali: mozangi-kondima, mondimi ya maloba, mpe mondimi. Kasi Nzambe azalaka na lolenge ya kotalisa nani azali mondimi. Mondimi yango atélemaka ngwi na oyo Nzambe alobaka ete ezali Solo. Iyo.

<sup>30</sup> Ezalaki Eliya, Motisibi, ntango akómaki na momekano ya nsuka, akanisaki ete atikalaki kaka ye moko na ekólo mobimba, oyo azalaki naino kobika mpo na Nzambe. Mpe mokonzi alingaki kolekisa ye na momekano. Banyokolaki ye. Mpe mwa mwasi ya mokonzi wana, oyo apakólápákólá elongi, na nkombo ya Yezabele, akánaki koboma ye. Mpe ntango momekano ya nsuka eyaki, Eliya abótolaki bikuke ya moyini na ye mpe azongisaki lisusu ekólo mobimba na Nzambe. Nzambe akokisaka elaka na Ye.

<sup>31</sup> Ezalaki Mose, nsima na ye kozala mpe na molongo ya Momboto mokonzi yango, Momboto ya Abraham, ntango atindamaki na Ezipito, mpo na kosikola bana ya Yisraele; mpe Nzambe apesáki ye bilembo ná bikamwa ya kosala, mpo na kobéta mokili, mpe kobénga magbólolo, ná mayanzi, ná molili,

ná mbula ya mabánga, mbula mpe móto, mpe asilaki kosala bikamwa nyonso wana. Nzoka nde, ntango abimisaki bango na nzela ya loboko ya Jehovah, ekomaki na ntango moko oyo akutanaki na ekuke moko katikati na ye ná mboka ya elaka. Mbu Motane ezalaki wana, ekangaki nzela. Bazíngámaki na mampinga ya Fálo, ná ba-ngomba, ná bilíki, mpe Mbu Motane. Kasi Mose akendeki liboso mpe abotolaki ekuke ya moyini na ye, mpe akátisaki Mbu Motane, ná sapato ekauka, wana azalaki kotambola na nzela ya putulú. “Akobótoka ekuke ya moyini.” Nzambe alobaki bongo, mpe yango ekati likambo.

<sup>32</sup> Mwa mibu na nsima, ntango mimekano eyaki, mpe lingomba eningisamaki na mobimba, ndenge ezalaka mpenza pete mpo na eyanganelo ya bato kosala, ntango likambo moko emonanaka kosalema te ndenge esengeli. Nzambe nde asálaka ete ézala bongo. Nzambe akótisaka kobendana na kati ya lingomba: “Mwana nyonso oyo ayáka epai na Nzambe asengeli koleka na mommekano, kopímama, mpe koleka na mimekano.” Atikaka ete bokono ébeta yo. Atikaka ete maládi ékómela yo, mpo na komeka yo mpe kolekisa yo na mimekano, mpo na kotalisa na mokili ete ozali mpenza Momboto ya Abraham. Apesaka yango nzela na mokano na Ye Moko. Apesaka nzela na makáma minene. Apesaka nzela ete baninga na yo bábalukela yo. Apesaka nzela na makambo nyonso wana, mpe Atikaka ete zábolo álanda yo, mpo na komeka yo. Mpe ye akosala nyonso, longola kaka kolongola yo bomoi. Akoki kobwaka yo na mbéto ya minyoko. Akoki kosala ete bazalani na yo bátelemela yo. Akoki kosala ete lingomba étélemela yo. Akoki kosala ata eloko nini, mpe ezali mokano na Nzambe kosala yango. Tosilá koteyama ete yango ezali na motuya monene koleka wólo, mpo na biso.

<sup>33</sup> Ezalaki boni mpo na Abraham ná Yisaka, likoló na ngomba, ye oyo elaka epesameláká ye? Mpe na nzela ya bosembo na ye, ná boyebi na ye, ná kondima na ye na Jehovah, ezali na nzela yango, mpe na yango kaka, nde Nzambe akitisaki miso mpe alobaki: “Momboto na ye akobotola bikuke. Nalápi ndai na Ngai moko ete Nakosala makambo yango.” Ezali na moko te ya monene koleka oyo Ye akokaki kokátá ndai na ye, kasi Akátáki ndái na Ye moko.

Na bongo, soki Atikaki ete Abraham áleka na mommekano ya nsuka wana, Asengeli mpe kolekisa yo ná ngai na mommekano ya nsuka wana, na ntango ya mokano wana, oyo makambo nyonso ekómaka mosika na yo. Osengeli kotikala yo moko kuna. Aleluya! Ezali bongo.

<sup>34</sup> Tikala yo moko. Kende kuna mpe lobá: “Ata Abomi ngai, nakotiela Ye kaka motema.” Oyo wana nde Momboto ya Abraham. Wana nde Oyo apesaka elaka. “Ata bamosusu balobi eloko nini, ata bamosusu basali eloko nini; ngai ná ndako na ngai, tokosalela Nzambe.” Alobaki: “Soki bamosusu balobi:



‘Kobikela likambo ezalaka na ntina te. Ezali kaka loyenge ya mpamba; mpo na ngai ná ndako na ngai, tokosalela Nzambe.’

Mpe nalingaka kosolola lokola Polo awa mpenza mpe koloba: “Na lolenge oyo bango babéngaka ‘lipengwa’, lolenge wana nde ngai nasambelaka Nzambe ya batata na biso.”

“Ata batióli bakóti na lingomba, ata bato bazali kobebisa makambo, ata lolenge nyonso ya basakoli ya lokuta ná makambo nyonso wana ekóti na lingomba katikati na bato, mpe na nzinganzinga ná nyonso wana; kasi mpo na ngai ná ndako na ngai, tokosalela Nkolo. Ata bango nyonso batiki na bango koya, mpe ata lingomba ekómi na malili, ná litió, ngai ná ndako na ngai, tokosalela Nkolo. Ata soki babondelaki mpo na moto mpe abikaki te; etali yango ata moke te; ngai ná ndako na ngai, tokosalela Nkolo.” Komekama ná mimekano.

<sup>35</sup> Bato basalaka mabunga, kasi Nzambe te. Moto, soki ozali kotálela moto, akosala libunga. Ntango mosusu na nkó te, kasi akosala yango. Nzambe akopesa ye nzela ásálá yango mpo Ákoka koningisa kondima na yo mosika na moto. Kondima na biso ezalaka na bwanya ya moto te, kasi na nguya ya lisekwa ya Yesu Klisto. Kuna nde esika oyo Momboto ya solo ya Abraham apemisaka elaka na ye. Mpamba te, bakoki kozala Momboto ya Abraham bobele ntango bayambi Molimo Mosanto. Soki bazangi Molimo Mosanto, bazali Momboto ya Abraham te. Kondima moko oyo ezalaki kati na Abraham nde eyaka kati na mondimi. Etali te eloko nini ekosalema to ekokesene ndenge nini, mondimi akóbaka kokende liboso.

<sup>36</sup> Banóngi bazongaki mpe balobaki: “Oh, ezali—ezali boléma komeka. Ntina ya kokende mosika koleka ezali te, mpamba te bato oyo bazali kuna bazali bingambé. Mpe bazali na boyangeli ya monene mpenza, mpe ba—bazali na makongá, mpe, ee, biso tozali kutu komonana lokola mayoyo na mopanzi na bango.”

<sup>37</sup> Nayebi te, kasi natindami kondimisama awa mpenza ete Yósua azalaki kaka mwa moto moko ya moke mpenza, mwa mwa moto moko ya moke mpenza. Nakoki komona ye kopumbwa likoló—likoló na kési moko boye, mpe koloba: “Bandeke mibali,” epai na bato milió mibale ete, “tozali mpenza na makoki ya kolóngá bango.” Bomoni? Mpo na nini? Wana ezalaki Momboto ya Abraham. Nzambe apesaki elaka yango. Yango ezalaki bozwi ya bango. Nzambe nde apesaki elaka. Etali te soko kotelemela ezalaki ndenge nini, Momboto ya solo ya Abraham alobaki: “Tokoki kobotola yango mpo Nzambe apesaki biso yango.”

<sup>38</sup> Wana nde epai otelemi na ntongo oyo. Wana nde epai Lingomba ya Nzambe na bomoi eteleme. Etali ngai te oyo moto mosusu nyonso alobi, oyo monganga alobi, ezala eloko nini, oyo mozangi kondima alobi, tozali mpenza na makoki ya koleka mpo na kobundisa nyonso oyo ekoya. Tozali Momboto ya Abraham, mpe tokobotola ekuke ya moyini na biso, etali te oyo moyini

yango ezali. Nzambe apesaki elaka yango. Wana ezalaki ya bango, libula na bango.

<sup>39</sup> Lobiko na nzoto ezali libula na yo. Lobiko ezali libula na yo. Molimo Mosanto ezali libula na yo. Mpe ezali na batei minene nkóto na nkóto ná bato mosusu na mboka lelo, oyo balobaka ete: “Ezali bongo te.” Kasi Momboto ya Abraham ayebi ete ezali bongo. Bakótaka kuna mpe babótólaka bikuke ya moyini. Nzambe alobaki ete bakosála yango. Bandimaka yango mpo ezali elaka. “Momboto na Ye akobotola ekuke ya moyini.” Sikawa bokoleka kati na komekama, mimekano.

<sup>40</sup> Mpe Yosua atélemaki wana, sembo. Mwa moto yango alobaki: “Monene na bango etali ngai te. lolenge ya makongá oyo bazali na yango etali ngai te, molai boni bitutu ya bingumba na bango ezali, mpe monene ndenge nini. Elaka na biso ezali ete: ‘Ekuke yango ekobotolama na Momboto ya bana na Nzambe,’ mpe tozali kokende kuna mpo na kobotola yango. Tozali mpenza na makoki ya kobunda na bango.” Oh, oyo wana nde Momboto ya solo.

<sup>41</sup> Mingi kati na bango, baoyo babótamaki na momboto ya mokili, balobaki: “Tokokoka na biso kosala yango te. Ntina ya komeka ezali te. Bomoni, tozali na bato mingi te. Tokokani na bango te; tokoki te na nyonso.” Ata bongo, alingaki te ko. . . Bango bazalaki kotala na. . . oyo liso ezalaki komona. Kasi Yosua azalaki kotala oyo Nzambe alobaki.

<sup>42</sup> Momboto ya Abraham atálaka biloko ya mokili te. Batálaka oyo Nkolo alobaki. Yango nde elaka. Bongo soki Abraham átalaka oyo ya mokili? Ná mwasi moko ya mibu mokama. . . Akómaki na mibu ntuku libwa. Ye akómaki na mibu mokama. Mpe abikaki elongo ná ye uta ntango ye mwasi azalaki elenge mwasi, mpe ye azalaki elenge mobali, mpe na momboto te. Atalaki makambo wana te. Alobaki ete azalaki komona makambo wana lokola ezalaki te, mpamba te azalaki kotala bobele likambo oyo Nzambe alobaki. “Nakopámbole yo, Abraham, mpe Nakopésa yo momboto na nzela na Sara.” Mpe andimaki yango. Bótálaka kotélémela oyo ezali te. Totálaka na oyo Nzambe alobaki. Nzambe alobaki yango, wana ekati likambo.

<sup>43</sup> Boye, ntango akómaki na Yaladene, ntango Yosua akómaki mokonzi ya mapinga, mpe bakómaki pembeni na mai yango mpenza mpe bakokáki kotala na ngámbo mpe komona Yeliko. Kasi, katikati na bango, ntango Yosua asilaki kobongisa mapinga na ye, ekuke moko ezalaki wana. Nkombo ya ekuke yango ezalaki Yaladene.

Kasi elaka ya Nzambe ezalaka malamumu mpo na bikuke nyonso. Ézala ekuke nini, elaka ya Nzambe ezalaka malamumu. “Akobótola bikuke ya moyini na ye.” Yango nde ekati likambo.

Ntango akómaki na Yaladene na ntongo wana, ntango mosusu, nakondima ete zábolo asalaki ete mapata ya mbula ya mopepe makasi ézala bisika nyonso, mai mingi ya potopóto ézalaki kokita, mpe bilanga ebebisamaki na mpela. Oh, ezalaki mpenza ntango ya momekano! Kasi Yosua alobaki: “Bómilengele, bokomóna nkembo na Nzambe.” Mpe bamíbúlisaki mpe bamilengelaki, komilengeláká ntango makambo nyonso emonanaki lokola kotélémela bango. Kasi oyo wana ezalaki Momboto ya Abraham, oyo Nzambe akátelaki ndai ete: “Nakopesa ye ekuke yango.” Akómaki na Yaladene, yango nde ezalaki ekuke na ye, mpe abótólaki yango.

<sup>44</sup> Moko na bantongo oyo ngai mpe nasengeli kokóma na ekuke ya nsuka wana. Osengeli kokóma na Yaladene, kasi Momboto ya Abraham akobótola ekuke yango. Ézala eloko nini, akobotola ekuke ya moyini nyonso.

<sup>45</sup> Bato nyonso wana bazalaki bato minene. Bakufaki kati na lotomo na bango. Kasi, sukasuka, mokolo moko na Beteleme ya Yuda, Mombóto Mokonzi abótámáki. Elingi koloba ete bamosusu nyonso bazalaki kaka bililingi. Momboto Mokonzi abótamaki, uta na moto te. Kasi Abótamaki na nzela na mongondo, ná nguya kati na misisa na Ye, mpo na kolóna kufa mpe ewelo. Nzambe apesaki elaka. Moto ya mokili akokaki kosala yango te. Kasi soki Nzambe apesi elaka, Azali Nzambe yango moko oyo Azalaki, mwa miníti moke liboso, ná Abraham, Jehovah-jiré, Nkolo akopesa nzela ya kobótola ekuke yango. Tokosala yango ndenge nini? Yosua akufaki. Mose akufaki. Bango nyonso bakufaki. Kasi Nzambe alobaki: “Akobótola ekuke ya moyini na ye.” Akobótola kufa ndenge nini? Azalaka na lolenge ya kosala makambo. “Akobótola ekuke ya moyini na ye.”

<sup>46</sup> Mombóto Mokonzi abótámaki. Amekámaki na ndenge nyonso lokola biso. Kaka ndenge bosengeli komekama, ezalaki mpe bongo mpo na Ye. Ntango Azuaki Molimo Mosanto, zábolo amemaki Ye na lombangu, na lisobe mpo na komekama mikolo ntuku minei, moi ná butu. Mpe ntango Abimaki . . . Mpe na liwa na Ye, babétaki Ye banséte na maboko, mpe babwákelaki Ye nsoi na elongi. Alekaki na bokono ya ndenge na ndenge. Kasi ntango Azalaki awa na mokili, Atalisaki polele ete Akokaki kolóna bokono. Ntango mama ya mwasi ya Petelo abelaki, bokono ya paralysie, Amamáki loboko na ye mpe fièvre etikaki ye. Ntango moto na mbála agángaki na ekuke: “Mbindo! Mbindo! Soki Olingi, Okoki kobikisa ngai.”

<sup>47</sup> Alobaki: “Nalingi. Bíkísámá.” Ye alóngaki mpe abótólaki ekuke ya maladi ya mbala. Abótólaki ekuke ya ba-fièvre.

Asálaki ete bokeli nyonso étosa Ye. Azalaki Momboto ya Abraham, Momboto Mokonzi, Ye oyo elaka epesamelaki; epai na Ye, Abraham ná Momboto nyonso oyo eyaki nsima na ye, kino na

Momboto Mokonzi, mpe Momboto nyonso nsima na Ye. Elaka ya Nzambe ezali solo. Alóngaki bokono.

Alóngaki masénginiá. Ntango moyini abwákelaki Ye nsoi na elongi mpe abétaki Ye na litáma, Apesaki litáma mosusu. Ntango bapikolaki Ye mandefu na elongi mpe babwákelaki Ye nsoi, Atikálá kozongisa na mafínga te. Alóngaki ekuke ya masénginiá mpe abótólaki yango.

<sup>48</sup> Bongo okoloba: “Nkanda na ngai ekotíka ngai te násala yango.” Yo, Momboto ya Abraham, iyo, mesie, Alóngaki yango mpo na yo.

<sup>49</sup> Ntango bafíngaki Ye, Azóngisaki na mafínga te. Ntango batiólaki Ye, Afandaki kimia. Ntango babéngaki Ye molimo mabe, Afándaki na Ye kimia. Azalaki na mosala moko, mpe yango ezali mosala ya Tata, mpe yango nde Akobaki kosala. Bongo, sukasuka, bamemaki Ye na ekulusu. Liwa esengelaki kokutana ná Ye. Bamosusu nyonso balongáká ba-mbu, mpe balongáká bokeli, balongáká bankosi, mpe balongáká móto. Balongáká nyonso, longola kaka liwa. Kasi ezalaki na Moko awa, na kati ya misisa na Ye, nguya ya kolonga liwa ezalaki kobéta. Boye bazuaki maboko na Ye, basémbolaki Ye mpe babétaki Ye banséte na ekulusu. Babétaki Ye mpe balongolaki Ye bilamba na lolenge ete mikuwa na Ye ekómaki kotala Ye. Kasi ntango basalaki bongo, mpe basalaki nyonso oyo bakokaki kosala, liwa ebetaki Ye, elobaki: “Sikawa Nakozua Yo ndenge nazuaki Yosua. Nakozua Yo ndenge nazuaki Daniele. Mpe nakosala nyonso wana, mpo nakosala ete Ókufa.”

<sup>50</sup> Mpe Akufaki na lolenge ete moi emiyokaki nsoni. Akufaki na lolenge ete bokeli eyokaki nsoni mpe eboyaki kosala. Moi eláláki na katikati ya mokolo. Minzoto eboyaki kobima. Akufaki na lolenge ete molili makasi eyáki, mpe okokaki komona loboko na yo liboso na yo te, na katikati ya mokolo mpenza. Nabanzi ete bokeli elobaki: “Nákufa na ngai elongo ná Ye.”

<sup>51</sup> Ndeko! Bongo zábolo atindaki molimo na Ye ya motuya na kati ya mabulu ezángá-nsuka ya ewelo. Kuna bikuke efungwámaki, kasi Abimaki na mokolo ya misato, Alongaki yango. Amen. “Momboto na Ye akobotola ekuke ya moyini.” Alongaki liwa! Alóngaki ewelo. Na ntongo ya liboso ya Pásika wana, Alóngaki nkunda. Sikawa totelemi balóngi koleka, na nzela na Ye Oyo alingaki biso.

<sup>52</sup> Na Mokolo ya Pantekote, Atindaki Molimo Mosanto, mpo na kokóba, na nzela ya bato ya Mabota, mpo na kobimisa Momboto ya elaka. Mpo na kopesa na bato ya Mabota, baoyo baboyami, kopesa bango libatisi ya Molimo Mosanto mpe kokótisa bango na Elaka. Sikawa tozali na makoki ya kolóna bokono nyonso. Tozali na ntina ya kolóna yango te; esilá kolóngama. Tosengeli kaka kosenga elaka mpe kokende kozua yango. Esilá kolóngama. Kufa elóngamá. Ewelo elóngamá.

Bokono elóngámá. Masénginiá elóngámá. Milimo mabe nyonso elóngámá. Lifelo elóngámá. Liwa elóngámá. Nkunda elóngámá. Totelemi na ekuke, kobótoláká yango, tozali na ntina ya kobéta masasi te. Motúya na yango esilá kofutama.

<sup>53</sup> Moyini na ye, akobótola ekuke ya moyini na ye. Bayini boni? Bankóto na ba-millions; akobotla ekuke ya bayini na ye, moyini nyonso. Asékwaki longwa na bakufi. Tozvu yango mpo Ye nde apesaki biso yango. Nyonso wana ezali likabo ya ofele, libanda na nyonso wana, mpe nyonso oyo Ye asalaki, mpe alóngaki bikuke nyonso. Ye alóngaki bokono, abótolaki ekuke yango. Likambo bobele moko oyo tosendeli kosala ezali kopusana na ekuke, koloba: “Na Nkombo na Yesu Klisto, Molóngi!” Amen.

<sup>54</sup> Ntango ekokoma na ngonga ya kokúfa, mpe liwa ekoloba: “Bótala ndenge nakosala ete áwangana losambo na ye.”

<sup>55</sup> “Na Nkombo na Yesu Klisto ya Nazaréte, zóngá nsima, Yaladene!” Momboto ya Abraham abótolaki ekuke yango.

<sup>56</sup> Ee, Polo alobaki, ntango balingaki kokáta ye motó, Momboto ya Abraham, alobaki: “Kufa, wapi esweli na yo? Nkunda, wapi elónge na yo? Matondi na Nzambe Oyo apesi biso elonga na nzela na Yesu Klisto.”

<sup>57</sup> Akobótola ekuke ya moyini na ye, Akozua yango. Sikawa, ye akobétama na ekuke te. Akolónge yango mpe akozua yango. Akobótola yango. Azali na nguya ya kosala yango.

<sup>58</sup> Kati na Lingomba na Nzambe ya bomoi, na ntongo oyo, nguya ya kobikisa bokono nyonso ezali. Kati na Lingomba na Nzambe ya bomoi, nguya ya kolónge masénginiá nyonso ezali. Kati na bozui ya Lingomba ya Nzambe na bomoi, na ntongo oyo, nguya ya kokanga lisumu na minyololo mpe kobwaka yango ezali, mpe ya kozua libatizi ya Molimo Mosanto, na Lingomba na Yesu Klisto.

“Nyonso oyo bozali na yango mposa, bósenga na Nkombo na Ngai, mpe ekopesamela bino. Etikali moke, mpe mokili (baoyo bazali Momboto te, mimboto oyo ezongisami sika te) bakomona Ngai lisusu te. Kasi bino bokomona Ngai, mpo ete Nakozala elongo na bino, ata kati na bino, kino na nsuka ya mokili.” Nini? Momboto Mokonzi. “Misala mizali Ngai kosala, bino mpe bokosala yango. Ngai moko Nakotatola ete Nazali elongo ná bino, mpo bilembo oyo ekolanda baoyo bakondima.”

Akobotola momboto ya moyini na ye. Akobotola. Momboto na Ye akobótola ekuke ya moyini na ye, ata ekuke yango ezali nini. Soki ezali bokono, masénginiá, lisumu, ézala ekuke nini, esilá kolóngama. Mpe Momboto ya Abraham esilá kobótola yango.

<sup>59</sup> Bozali na esengo, na ntongo oyo, ya koyeba ete tozali sikawa balóngi koleka, boye te? Balóngi koleka! Oh, eloko ya kobundela ezali te. Etumba esilí. Piólóló esilá kobeta. Bendéle

esílá kotómbwama. Mpe katikati na liboke moko na moko ya masumu, katikati na chambre ya mobeli moko na moko, ekulusu ya kala wana ezali, elonámá na Makila na Yesu Klisto, Molóngi. Eloko kaka moko oyo tosalaka ezali kondima, kotala mpe kozala na bomoi.

“Nakozala elongo ná bino. Nakotalisa yango polele. Bato bayáka na mikolo ya nsuka, mpe balobaka: ‘Oh, ee, oyo wana *ezalaki*.’ Kasi Nakozala elongo na bino. Mpe makambo mpenza oyo Ngai nasálaki, awa na mokili, Nakozala kati na bino, mpo na kosala makambo yango moko mpenza. Na bongo bakoyeba. Bakomona Ngai. Ba. . . Bato na Ngai bakomona Ngai. Momboto ya Abraham bakomona Ngai. Bakoyeba Ngai. Bakosólsa Ngai. Bamosusu bakobenga Ngai ‘Bezezebula,’ kaka ndenge basálaki. Kasi bino bokoyeba Ngai, mpo Nakozala elongo na bino. Bokomona Ngai, bokomona na miso na bino. Bokomona Ngai, mpo ete Nakozala elongo na bino, kino na nsuka ya mokili, makambo yango moko mpenza oyo Nazali kosala. Ye oyo akondimela Ngai, misala mizali Ngai kosala, ye mpe akosala yango, misala ya ndenge moko.”

<sup>60</sup> Mpe, lelo, Lingomba ya Nzambe na bomoi ezali na litómba ya kozala wana mpe komona Yesu Klisto oyo azali kolonga mpe asékwaki, Mwana na Nzambe na bomoi, kotelema awa, kobikáká kati na bomoi na Lingomba na Ye, kosaláká makambo moko oyo Asalaki na eleko wana. Na bongo tobotoli ekuke ya moyini nyonso.

<sup>61</sup> Soki ozali na moyini moko na ntongo oyo, na bongo, ndeko na ngai, ezali bobele, soki ozali Momboto ya Abraham, nsima na koyoka oyo, ezali na milimo mabe ya kokoka te na lifelo oyo ekoki kokóba kobatela ekuke wana liboso na yo. Ekofungwama. Ezali na ntina te soko ezali nini. Yo pusana wana, lokola Momboto ya elaka, lobá: “Nalobi ete ekómi ya ngai. Oyo ezali ya ngai, mpo Nzambe akátaki ndai ete Akosekwisa Yesu, mpe, na nzela na Yesu, nakolonga yango. Nayeri na Nkombo ya Molóngi yango, Yesu Klisto. Zóngá nsima. Nazali koleka.” Amen. “Akobótola ekuke ya moyini.” Na bongo telema wana, zóngisa mapeka na nsima mpe ngengísa nguba na yo, ezipami na Makila ya Nkolo Yesu. Moyini akoyeba yango.

<sup>62</sup> Soki ozali na bosenga, sololá na Ye sikawa, wana tozali kobondela, bino baoyo bozali awa, na ntongo oyo, wana bogumbi mitó. Mpe soki ozali na bosenga, okolinga kaka kotómbola loboko epai na Yesu? Mpe lobá yango na motema na yo, na motema na yo, mpe loba: “Nkolo, Oyebi bosenga na ngai. Sikawa, nayoki, na ntongo oyo, mpe wana ezali Biblia, ete ‘Akobótola ekuke ya moyini.’ Nayeri kobótola ekuke yango. Ntango mosusu nazalaka nkanda–nkanda. Ntango mosusu nasengeli na Molimo Mosanto. Lisumu ekangi ngai mobimba. Nazali na bosenga. Kasi nayeri na ekuke yango sikawa.

Nakokonza yango, na ntongo oyo, ekuke na ngai. Boye, pesa nzela, ngai nazoya koleka.”

<sup>63</sup> Nkolo Mopambolami, Omoni maboko nyonso oyo. Mpe Oyebe ete oyo ezali Liloba na Yo, Nkolo. Nazongeli na ngai kaka Yango, mpe natalisi na nzela ya Makomi. Bato ya Biblia, ndenge balóngaki makonzi mpe basálelaki boyengebene, mpe babómaki móto, basilisaki makasi ya móto, bakimaki mopotú ya mopangá, mpe bakangáki minoko ya bankosi, mpe, oh, lisusu, basi bamonaki lisusu bakúfi na bango kozonga na bomoi, ná makambo ebele, mpo Olakáki yango. Ezali elaka na Yo: “Momboto na Ye.” “Momboto na Yo, Abraham, akobotola ekuke ya moyini.” Mpe Ozali kokokisa elaka na Yo.

<sup>64</sup> Sikawa pésa bango, Nkolo, mposa ya mitema na bango. Tika ete bábima awa bato ya ndenge mosusu. Tika ete bákende, koyebáká ete bazali—bazali balóngi, mpo Momboto Mokonzi alóngaki mpo na bango. Mokonzi Monene, ntango Ayaki, abotamaki na mongondo, Alongaki bayini nyonso, ata kufa. Boye, liwa yango moko ekoki kobangisa Momboto ya Abraham te. Tozali na elaka ete tokosangola mabelé, mpe tokozónza lisusu na lolenge ya nkembo koleka, na nzoto oyo ekémbisami, nsima na monguna ya nsuka kotiáma na nsé ya makolo ya mwana bobele moko mpe ya nsuka ya Nzambe, oyo akokota na Bokonzi.

<sup>65</sup> Soki na kati na baoyo batomboli maboko, Nkolo, bamosusu bazali basumuki, bikisa bango. Baoyo bazali kozonga nsima, tíka ete báyebe ete bazali na ntina ya kotikala mozóngi-nsima te. Akoki kobótola ekuke wana ya kozónza-nsima. Ntango mosusu oyo ya nkanda-nkanda, lo—lolemo kolobá makambo ya mabe, ya mbindo, to motema ya bilúlélá, to oyo ya lokoso ya mbongo, to—to eloko moko ya mbindo, tika ete báyebe ete bakoki kobótola ekuke yango. Ntango mosusu ezali bokono, Nkolo, to mpasi. Bakoki kobótola ekuke yango: “Mpo Azokisamaki mpo na masumu na biso, Atútámaki mpo na mabe na biso. Etumbu oyo epésaka biso kimia ezalaki likoló na Ye, mpe na mapipi na Ye biso tobíkísamaki.” Tozali balóngi, na ntongo oyo. Kokisa yango, Nkolo.

Mpe likoló na nyonso wana, mosala monene oyo esalamaki na Ye, ata bongo, Azali elongo ná biso. Ata bongo, Alakáki ete Akosála yango. “Etikali moke, bamokili bakomona Ngai lisusu te, kasi bino bokomóna Ngai; mpo ete Nakozala elongo na bino, ata na kati na bino, kino na nsuka ya eleko.” Nabondeli, Tata, ete Ósala ete moto moko na moko áyebe Yo, na ntongo oyo. Mpo tosengi yango na Nkombo na Yesu. Amen.

<sup>66</sup> Bondimi ete ezali Solo? Bóndima yango na limemia mpenza ete ezali Solo, na ntembe ata moke te na motema. Sikawa bóbosana likambo oyo te. Mosala ya Molimo Mosanto ezalaka pete mpenza na lolenge ete ebúlúnganisaka milimo ya mayele ya bongó. Makambo ya pete koleka oyo nasilá. . . namóná Molimo

Mosanto kosala yango. Nalobá makambo oyo, ee, nakokaki kokanisa te ete ezalaki bongo. Soki nasengelaki kosalela makanisi na ngai moko, nalingaki koloba: “Ee, ekoki kozala bongo te.” Kasi ezalaka ntango nyonso bongo. Asalaka makambo na pete mpenza. Mpe Asalaka makambo mpo na komitalisa Ye moko na bato na Ye. Nzambe azali elongo ná bato na Ye. Azali katikati na bato na Ye. Alingaka bango. Mpe Alingaka kosala mpo na bango, mpe kosunga bango; mpe kosala ete báyebe, eloko oyo Ye *akosala* te, kasi eloko oyo Ye *asili* kosala. Asili kosala yango. Ekómi ya yo. Ezali ya yo. Ezali likabo ya ofelé kouta na Nzambe Tata na biso, na Lingomba na Ye.

<sup>67</sup> Sikawa, makanisi ya mayele ya bongó ekozua na mobulungano mpenza, ndenge esalemaki na mikolo ya Daniele, mpe na mikolo ya bana ya Baebele, ná—ná bato mingi oyo touti kolobela na ntongo oyo. Bomoni, mokili ya mayele ya bongó ya eleko wana, ezalaki mpenza mpasi mpo na kolóngá yango, lokola oyo ya lelo. Ezalaka ntango nyonso moyini, na lolenge na bango ya komona, ná science na bango ya mikolo wana mpe nyonso wana, ezalaki mpenza kókóso mpe nyonso wana, mpo na makanisi na ntango wana, lokola oyo ya biso ezali lelo. Bomoni, ezalaki ndenge moko. Kasi ezalaki na baoyo, ntango nyonso, baoyo batiáki mpiko ya kotikala kuna mpe koloba: “Nzambe alobaka sólo. Liloba na Nzambe ezali solo.”

<sup>68</sup> Mpe, yo, ozali na ntina ya kolóngá te, mpo Ye alóngaki. Likambo bobele moko oyo osengeli kosala, ezali kaka kokende kuna kozua, kotelema na ekuke, koloba: “Ezali ya ngai. Oyo ekómi ya ngai. Nzambe nde apesaki ngai yango, lobiko na ngai. Soki nazali na mposa ya Molimo Mosanto, Nzambe apésaki ngai Yango. Elaka yango ezali mpo na ngai, mpo na bana na biso, mpo na baoyo nyonso bazali mosika, baoyo nyonso Nkolo akobenga.” Yango wana natelemi. Kaka . . .

<sup>69</sup> Lotómo na ngai, ya lisósoli ya makanisi mpe bongo na bongo, kala mingi te ekosila. Oh, ekozala wana ntango nyonso. Kasi, kala mingi te ekosila, mpamba te ezokende na kokoma eloko moko ya monene koleka. Bomoni? Ezokóba komata; kobanda na kosimba loboko, ematáki na lisósoli ya makanisi, sikawa elengelami kokóma eloko mosusu. Bomoni? Bomóni yango. Bótala yango malamú mpe bóyebe ete ezali solo. Bomoni? Nayebi ete ezali Solo. Mpe ekokóma monene koleka, likoló koleka, malamú koleka. Ya solo. Ee, Alakaki yango. Mpe eloko oyo Alakaka, Asalaka yango. Akoki kozánga kokokisa elaka na Ye te. Mpe ezali nini? Bozali na Ye ya ntango nyonso elongo ná biso, mpo na kotika yango, mpo na koyebisa yo ete Asili kobótola ekuke yango mpo na bino.

<sup>70</sup> Azalaki Momboto Mokonzi. Moto moko te akokaki kobótola bikuke yango, kaka Ye. Bato nyonso ya kala bazalaki bililingi ya boyei na Ye. Kasi ntango Ayáki, esilaki etumba mobimba. Etumba esilaki na Getesemane mpe na Kalvari. Mpe sikawa



totelemi kaka, lokola balóngi. Etumba ya kobunda ezali te. Biso. . . Etumba esili. Tokomi bakoló na yango, tozui buku ya lopango yango. Nandangá oyo ekomami na Nzambe, Tata na biso, Oyo atómbolaki loboko na Ye, alobaki: “Nakokáta ndai na Ngai moko ete Momboto na ye akobótola ekuke ya moyini.” Yango mpenza. Esílá kobótolama. “Ye *azokisamaki* mpo na masumu na biso. Na mapipi na Ye, biso *tobikisamaki*.” Esílá kosalema. Mosala yango esílá kosalema. Biso tobótoli yango kaka. “Mpe misala mizali Ngai kosala, bino mpe bokosala yango.” Mokonzi azali elongo na biso, na ntongo oyo. Mapamboli na Ye ya minene, Molimo Mosanto, ezali kotambola likoló na biso. Komiyoka nkembo ya ndenge wana, koyeba ete ezali mpenza elongo ná. . . na molongo ya Liloba na Nzambe. Epésaka biso libóndisi ya malamumu mingi, koyeba ete—ete Nzambe azali Tata na biso.

<sup>71</sup> Sikawa, nabanzi, a—akabólaki ba-kálati ya mabondeli na ntongo oyo? Nayebisaki ye, malamumu, soki kaka bato ya tabernacle nde bazali kuna, ee, ete ákabola ba-kálati ya mabondeli te. Kasi soki ezali na bapaya oyo ba—bakoki kozala zomi na mitano, to pene na yango, oyo basili kokóta, ee, ete ákabola ba-kálati ya mabondeli, mpo tókoka kobénga bango awa mpe kobondela mpo na bango. Bapaya boni bazali elongo ná biso na ntongo oyo? Bótombola maboko. Oh! la la! Ya solo. Bazali zomi na mitano to ntuku mibale. Malamumu. Tokosala molongo ya baoyo bazali na ba-kálati ya mabondeli mpe tokobenga bango awa na etumbelo. Bomoni, ntina oyo nalobaki bongo mpo na bato ya “tabernacle”, ezali mpo bazalaka awa.

<sup>72</sup> Lisósoli ya makanisi, bóbosana te, nazali kolobela yango, lisosoli ya makanisi ekokóma na nsuka, kala mingi te, eloko mosusu ya monene koleka mpenza ná oyo ya malamumu koleka mpenza ezali na nzela. Ezalaki, na boyebi na ngai, bomoni, nazali kotala bandeko mibale sikawa, oyo bazalaki elongo ná ngai lobi eleki, ntango likambo yango esalemaki, bomoni, mpe mokolo moko liboso, ntango esalemaki. Mpe ekokisi mbala misato ya kolandana, sikawa, oyo yango esalemi, litatoli, ete ekómi mpenza pene, bomoni, ete elingi kosalema.

<sup>73</sup> Sikawa, Nkolo, Ozali Nzambe, mpe biso tozali basali na Yo. Totondi Yo mpo na Liloba na Yo, mpo na Molimo Mosanto, Oyo asili kopámbola mitema na biso. Sikawa tozali na esengo. Tofandi awa, koyebáká ete tozali balóngi. Tosili kobótola bikuke nyonso ya moyini. Epésameli biso, mpe tozali na fungóla oyo efungolaka nyonso na loboko na biso. Nkombo na Yesu Klisto ekozala. . . ekofungola bikuke nyonso ya moyini. Bózua fungóla yango, fungóla ya Nkombo na Yesu, mpe bó-. . . bófungola bikuke nyonso ya moyini, oyo ekangaki bino mosika na elaka nyonso.

Mpe, e Nzambe, na ntongo oyo, toyeyi na Nkombo na Yesu, ná fungóla oyo, mpo na kofungola bikuke mpo na babéli ná bato na mawa. Mpamba te ekomami na—na Liloba na Ye ete:

“Na Nkombo na Ngai bakobengana milimo mabe. Bakoloba minoko na sika. Mpe soki basimbi banyoka, to bameli eloko oyo ebomaka, ekosala bango mabe moko te. Bakotielala babéli maboko mpe bakobíka.” Toyebi ete makambo yango ezali solo. Mpe sálá, na ntongo oyo, Nkolo, ete bákoka, bato bázala na makoki ya komona yango, na nzela na kokokisama ya Liloba oyo ekómaki nzoto mpe efándi elongo na biso, ete: “Azokísamaki mpo na masumu na biso; na mapipi na Ye biso tobíkísamaki.” Mpe tika ete báyamba yango mpe bábíkísama, na ntongo oyo, na bokono, maladi mpe ba-mpasi na bango nyonso. Tosengi yango na Nkombo na Yesu. Amen.

<sup>74</sup> Teddy, okolinga kobeta *Ndimba Kaka*, na kimia mpe malembe, soki olingi.

Mpe ezali nini? Obandaki na moko? Motángo ya moko, kálati ya mabondeli. Moko, mibale, misato, minei, mitano, motoba, nsambo, mwambe, libwa, zomi, to nyonso oyo ekoki kozala. Malamu. Na kimia mpenza, soki bokoki kotelema mpe koya na ngámbo oyo.

[Ndeko moko alobi: “Obengaki bato boni?”—Mok.] Ha? [Moto moko alobi: “Ezali bongo. Ezali bongo.”] Pene na . . .

Tótala naino, motángo ya liboso, motángo ya mibale. Nani azali na kálati ya mabondeli motángo ya liboso? [Ndeko moko alobi: “Ngai nazali na yango.”—Mok.] Iyo. Motángo ya mibale. Malamu, misie. Motángo ya misato, motángo ya minei, motángo ya mitano, motángo ya motoba, motángo ya nsambo, motángo ya mwambe, motángo ya libwa, motángo ya zomi.

<sup>75</sup> Wana bazali kopusana mpe kozua bisika na bango ya kotelema, nalingi kotuna motuna na bamosusu kati na bino. Bato boni, ezali na bato ya tabernacle awa, baoyo bazali na bokono? Bato ya tabernacle, bótombola maboko. Pene na mitano . . . minei, mitano, motoba, nsambo, mwambe. Maboko mwambe to libwa. Ezali na moto moko awa na tabernacle, oyo azalaka awa na tabernacle te, baoyo bazali bapaya epai na biso, ata ntango mosusu oyáki awa nsima na liteya mpe ozuaki kálati ya mabondeli te? Okoki kotómbola loboko? Moto nyonso oyo azali na mposa ya Nzambe, oyo azalaka te . . . oyo—oyo asámbelaka na tabernacle oyo te. Moto nyonso awa, oyo azali mondimi ya tabernacle oyo te, mpe—mpe ozali na bokono kasi ozali na kálati ya mabondeli te, olingi ete tókanisa yo na libondeli? Okoki kotómbola loboko, moto nyonso? Malamu. Ezali malamumu. Malamu.

<sup>76</sup> Sikawa nakosenga na bino ete bózala na limemia mpenza, mpo na mwa—mwa miníti moke, na nsima tokobanda mbala moko. Sikawa tótala naino. Otikali na bisika boni kuna, Billy? Malamu. Ozali na motángo ya zomi kuna? Nabéngaki moko kino zomi.

Zomi na moko, zomi na mibale, zomi na misato, zomi na minei, zomi na mitano, bátelema sikawa. Soki bazali na motángo ya zomi, zomi na moko, zomi na mibale, zomi na misato, zomi na minei, zomi na mitano, bátelema. Malamu. Moko, mibale, misato, minei, mitano, motoba, nsambo, mwambe, libwa, zomi, zomi na moko, zomi na mibale. Mibale mosusu bazáangi, kobanda na moko kino na zomi na mitano. (. . . ? . . . nsambo, mwambe, libwa, zomi, zomi na moko.) Zomi na mitano, zomi na motoba, zomi na nsambo, zomi na mwambe, zomi na libwa, ntuku mibale.

<sup>77</sup> Oh, zela naino. Na—nayebisaki ye ete ákabola ba—kálati ya mabondeli kaka epai ya bato oyo bayáka na tabernacle te. Ezali solo. Bomoni? Mpamba te, ekozala, bomoni, lisósoli ya makanisi. Bato balobaka: “Bato yango bayáka na tabernacle.” Bomoni? Bó—bóyoka. Bato boni basílá kozala awa . . . bakómá naino awa te liboso? Bólakisa maboko, moto moko te asílá kozala na moko na mayángani na ngai liboso. Malamu. Malamu.

Sikawa, malamu, sikawa, zela naino, Ndeko Teddy.

<sup>78</sup> Sikawa, nakoki koloba boye, ete, bino nyonso bosílá koyoka makambo oyo esálemaka na mayangani, ata bongo, boye te, bato nyonso basílá kozala na mayangani? Bomoni? Ntango Nkolo na biso Yesu azalaki awa na mokili, Alobaki te ete Azalaki Mobikisi na bokono. Azalaki Momboto ya Abraham, na ntembe te, mpe Azalaki na elaka elongo na Ye. Alobaki ete Azalaki kosala eloko moko te soki Tata alakisaki Ye yango te. Ezali solo? Mpe Alobaki: “Nakoki kosala eloko moko te soki Tata alakisi Ngai te nini kosala.” Mpe Azalaki komona yango na . . . Ezali te “soki Tata *ayebisi* Ngai.” “Soki Tata *atalisi* Ngai.” Santu Yoane 5:19: “Oyo Namonaka Tata kosala, Mwana mpe asalaka yango ndenge moko.”

<sup>79</sup> Sikawa ntango A—Ayaki, tomoni ete, na ebandeli ya lotomo na Ye, ete nsima na Ye kozua e—ebóngá ya Dawidi . . . [Maloba mazangi na bande—Mok.] Na elobeli ya molimo . . .

Ntango Molimo Mosanto ekitaki likoló na Ye na libatishi, ya Yoane, Akómaki Masiya oyo apakólami. Sikawa, bómikanisela, Azalaki Mwana na Nzambe ntango Abotamaki. Azalaki Mwana na Nzambe oyo abotamaki na mongondo. Kasi ntango Akómaki Masiya, nde ntango Molimo Mosanto ekitaki likoló na Ye, mpamba te *Masiya* elingi koloba “mopakolami.” Bomoni? Mpe Akómaki Mopakolami ntango Molimo Mosanto ekitaki likoló na Ye. Boyokaki ngai koteya likoló na *Mwana-mpate Ná Ebengá*. Bongo tomoni ete, ntango Ye . . . Nsima na mikolo ntuku minei ya komekama na Ye, Abimaki.

<sup>80</sup> Mpe lotómo na Ye ebandaki ndenge nini, mpe esilaki ndenge nini? Tomoni na lotómo na Ye ete ezalaki na moto moko, na nkombo ya Andele, akendeki kokutana ná ndeko na ye, Simona, molóbi—mbisi, mpe amemáki ye epai na Yesu. Mpe Yesu ayebisaki ye, alobaki: “Nkombo na yo ezali Simona. Nkombo ya tata na yo

ezali Yona. Banda lelo, nkombo na yo ekómi *Petelo*, elingi koloba ‘libanga moke.’” Bozali komikanisela yango? Mpe moto yango akámwaki mingi na likambo oyo Yesu ayebisaki ye!

Sikawa, Masiya asengelaki nde kosala yango? Bato boni bayebi yango, báloba: “Amen.” Asengelaki kozala Nzambe-Mosakoli. Iyo, mesie. Mose alobaki: “Nkolo Nzambe na bino akotélemisa Mosakoli moko lokola ngai. Ekosalema ete moto oyo akoyoka Mosakoli yango te akolongolama kati na libota.”

<sup>81</sup> Sikawa, na bongo ntango tomoni, na nsima, ya Ye. . . “Ayaki epai na baoyo ya Ye.” Ezalaki banani yango? Bayuda, na nzoto. “Na bongo baoyo ya Ye Moko bayambaki Ye te,” boye, Asengelaki bongo. . . Sikawa esengeli kokende epai ya Mabota, bomoni, mpo baoyo ya Ye Moko bayambáki Ye te. “Kasi na baoyo nyonso bayambáki Ye, Apésaki bango nguya ya kokóma bana na Nzambe.” Boye sikawa, Abalukaki epai ya Mabota, mpe esili kokokisa mibu nkóto mibale. Kasi sikawa, bótala makambo oyo Asalaki.

<sup>82</sup> Na nsima Filipe, nsima na ye komona likambo yango kosalema, akendeki komónana na Natanaele, mpe ayebisaki Natanaele Moto oyo ye amonaki mpe oyo Asílaki kosala. Mpe ekamwisaki ye. Akokaki mpenza te kondima yango. Kasi ntango akómaki Liboso na Nkolo Yesu, ntango amonaki esika oyo Ye azalaki, akómaki Liboso na Ye, Yesu alobaki: “Tálá Moyisraele oyo na kati na ye bokósi ezalaka te.”

<sup>83</sup> Sikawa, soki bozalaki wana, bokanisi ete bolingaki kozala na molimo oyo ekoki mpo na kosósola nani oyo Ye azalaki? Bokanisi ete bolingaki kosála yango? Sikawa bótala malamumu. Bomoni? Moto yango, azalaki mpenza Mopaya, molob- . . . kuna, Akokaki kozala molóbi-mbisi. Azalaki mosali-mabaya, nde oyo Ye azalaki. Mosali ya mabaya oyo atélemaki wana, Mobali ya mwa mokólo. Mpe moto yango akómaki wana. Yesu atálaki ye, lokola moko na bato oyo bazali awa, Alobaki: “Tálá Moyisraele oyo kati na ye bokosi ezali te.” Ee, Ayebaki ndenge nini ete azalaki Moyisraele? Na elateli na ye te, mpo bango nyonso bazalaki kolata ndenge moko. “Kati na ye bokosi ezali te.” Ayebaki ndenge nini ete azalaki mo—moto na bosembo?

<sup>84</sup> Boye, ekamwisaki moto yango. Lokola azalaki mondimi ya solosolo, alobaki: “Rabi,” to ndeko, motei, molakisi, “Omóná ngai ntango nini?” Bomoni, azalaki kotuna Ye motuna.

<sup>85</sup> Alobaki: “Liboso Filipe ábenga yo, ntango ozalaki na nsé ya nzete, Namonaki yo.”

Alobaki: “Ozali Mwana na Nzambe. Ozali Mokonzi ya Yisraele.”

<sup>86</sup> Yesu alobaki: “Lokola Nayebisi yo likambo oyo, sikawa óndimi Ngai? Sikawa okomona makambo ya minene koleka oyo.”

<sup>87</sup> Mpe yango wana nandimi ete Lingomba ya Nzambe na bomoi ekomóna likambo ya monene koleka oyo. Elingi kokota kati na yango sikawa, etikali moke, bomoni, mpo bandimaki yango. Baoyo baboyaki yango, mpo na bipekiselu ya badenomination, nandimi te ete bakondima lisusu likambo moko. Bomoni? Makambo. . . To okotambola kati na Pole to okokufa miso. Pole ebomaka miso, to elakisaka nzela.

<sup>88</sup> Bandeke ya mike, namonaki yango na Statue ya Liberté. Sala nyonso ómona yango, Ndeko Thoms, ntango okokende, omoni. Mitó na bango epanzanaka, ntango batútanaka na yango. Mpe nalobaki: “Ezalaki likambo nini?”

<sup>89</sup> Balobaki: “Na esika ya kolanda pole, na ntango ya mopepe makasi, kino na ebombamelo, bango balukaki nde kobeta pole yango mpo báboma yango. Bango nde bamibomaki.”

<sup>90</sup> Yango nde likambo bobele moko oyo esálemaka soki obeti mpe otelemeli Pole, ókomiboma yo moko, na molimo. Tambola kaka kati na Pole ndenge Ye azali kati na Pole, na bongo tokozala na boyokani kati na biso, mangomba nyonso bakondima, bakokende liboso mpe bakosepela na mapamboli ya Nzambe. Ekozala malamunging, boye te?

<sup>91</sup> Bótala mwasi Mosamalia ntango ayaki. Azalaki Mosamalia, sikawa (Moyuda te), Mosamalia. Mpe Yesu alobaki: “Yéla Ngai mai ya komela.” Mpe lisolo ekóbáki.

Sikawa, oyo ezali mpo na baoyo bayei sika.

<sup>92</sup> Mpe lisolo ekóbáki. Sikawa, ayebaki ata moke te Azalaki Masiya. Azalaki kaka mo—Moto, Moyuda. Bomoni ndenge alobaki na ebandeli? Alobaki: “Ee, ezali momesano te mpo na bino Bayuda kosolola ná mwasi Mosamalia boye.” Alobaki: “Toyókanaka te biso ná bino.”

<sup>93</sup> Alobaki: “Kasi soki óyebaka Nani oyo ozali kosolola na Ye, yo nde olingaki kosenga Ngai mai. Mpe Nalingaki koyela yo mai, kopesa yo mai, olingaki lisusu koya kotóka mai awa te.”

<sup>94</sup> Ee, alobaki: “Sikawa, zela mwa miniti.” Alobaki: “Biso tosámbelaka na ngomba oyo, mpe—mpe bino Bayuda bosámbelaka na Yelusaleme.”

<sup>95</sup> Yesu alobaki: “Kasi ntango ezali koya, oyo—oyo bokosámbela na Yelusaleme to na ngomba oyo te, kasi na Molimo. Mpamba te Nzambe azali Molimo, mpe baoyo basámbelaka Ye basengeli kosámbela Ye na Molimo mpe na Solo.” Bomoni? Ee, Akóbaki, mpe amemáki lisolo yango kino ntango Amónaki esika oyo kpokósó na ye ezaláki. Ezali nini, boyebi esika nini likambo na ye ezalaki? Moto moko ayebi likambo ya mwasi yango na libulu ya mai ezalaki nini? Azalaki na mibali mingi ebele, boye te? Boye Alobaki na ye: “Kende kozua mobali na yo mpe bóya awa.”

Alobaki: “Nazali na mobali te.”

<sup>96</sup> Alobaki: “Ezali solo. Ozali na bango mitano, mpe oyo ozali kobika na ye sikawa azali ya yo te.”

<sup>97</sup> Alobaki: “Mesie!” Sikawa bótala ye malamumu. “Mesie, namoni ete Ozali Mosakoli.”

Soki botángi oyo ekomami pembeni na lokasa, bokomona yango. “Mesie,” na makomi ya ebandeli, “Yo ozali, namoni ete Yo ozali Mosakoli *yango*.” Bóyebi lisusu, na Biblia, ekobaka koloba: “Mosakoli yango, Yo nde ‘Mosakoli yango?’” Ezalaki Mosakoli oyo wapi? Ye oyo Mose alobáká ete Akoya.

“Namoni ete Yo ozali Mosakoli. Sikawa, batéyá biso, mpe toyebi ete ntango Masiya akoya, Akosala makambo oyo.” Yango nde ezalaki elembo ya Masiya. Ezali bongo? Koyeba oyo kpokósó na ye ezalaki. Alobaki: “Toyebi ete ntango Masiya akoya, Akoyebisa biso makambo oyo. Kasi Yo ozali Nani?”

Alobaki: “Ngai nazali Ye, oyo azali koloba na yo.”

<sup>98</sup> Atikaki mbeki na ye, apotaki mbangu kino na engumba, nabanzi, asimbaki motema na ye, mpe azalaki koloba, atiaki maboko na ntólo, motema ezalaki kobeta makasi, kolobáká: “Bóya kotala Moto moko Oyo ayebisi ngai makambo oyo nasálá. Azali mpenza Masiya yango te? Ezali te mpenza Ye oyo Biblia elobelaki ete Akoya? Ezali Moyuda moko nde afándi kuna, Moto lokola bato nyonso, azali lokola mosali ya mabaya. Kasi Ayebisi ngai ete nazalaki na mibali mitano, mpe bino nyonso boyebi ete ezali solo. Moto yango Asengeli kozala Masiya.” Ezali bongo?

<sup>99</sup> Sikawa, Yesu alobaki: “Etikali moke, na mwa ntáka ya ntango, bamokili bakomona Ngai lisusu te. Kasi, bino bokomóna Ngai, mpo Nakozala elongo na bino, ata kati na bino. Mpe misala mizali Ngai kosala, bino mpe bokosala yango. Bokosala koleka ata oyo Ngai nasali awa, mpo Nazali kokende epai na Tata, kozonga na lolenge ya Molimo.”

Mbeka esíli kofútama. Momboto Mokonzi akufaki; Momboto Mokonzi asekwaki. Sikawa Lingomba esémbolisami, wana bandimi yango, mpe Momboto Mokonzi akoki kokota na kati na bato oyo mpe kokómisa bango ata basangoli elongo, bana mibali mpe bana basi ya Nzambe.

<sup>100</sup> Sikawa, mpo na bino nyonso oyo bozali kuna, baoyo bazali na molongo ya mabondeli oyo te, nayébisaki ye ete ákabola ba-kálati na bato oyo. . . ntango nabengaki ye na ntongo oyo. Abéngaki ngai, alobaki: “Olingi ete nákende kokabola ba-kálati, papa?”

<sup>101</sup> Nalobaki: “Soki bato bazali zomi oyo bazalaka bato ya tabernacle te.”

<sup>102</sup> Sikawa, mbala mosusu na tabernacle, nabéngaka mpe nakabolaka ba-kálati ya mabondeli. Bozóngaka mpe bolobaka: “Ee, ayébaki bango. Bazalaki bato ya tabernacle. Ayebaki makambo na bango. Na ntembe te.”

103 Na bongo nabalukaka, nalobaka: “Kaka na baoyo bayaka na tabernacle te, báya. Malamu. Bino baoyo bosámbelaka na tabernacle te, bino nde bokokóta na molongo ya mabondeli.”

104 “Oh, toyébaki bango te,” elobi bato ya tabernacle. “Toyebi likambo na bango te. Ntango mosusu azalaki na ye kokósa na ntina na yango.” Bomoni?

105 Na nsima nalobaka: “Moto moko te áya. Tika ete Molimo Mosanto ápona baoyo bazali awa, oyo basámbelaka na tabernacle te, baoyo bafándi kaka wana.” Ata bongo, bino. . .

106 Ezali na lolenge ata moko te ya komema moto epai na Nzambe, kaka soki abongísámá liboso mpo na kozala mwana na Nzambe. Ezali ata na lolenge moko te ya kosala yango. Yesu alobaki: “Moto moko te akoki koya epai na Ngai soki Tata na Ngai abendi ye te.” Oyo wana nde Solo. Nyonso oyo Asalaki, bazalaki kotelemela yango. “Soki Asálaki yango *boye*, esengelaki kozala *boye*. Mpe *boye*, esengelaki nde kozala lisusu lolenge *wana*.” Bomoni, ezali kaka kozanga kondima. Kasi bwanya esémbólisámi na nzela ya bana na ye. Boye, bino, bomoni.

107 Sikawa awa, nazomeka koloba na—na eyanganelo ya bato oyo, boye, ete Yesu Klisto azalaki Momboto Mokonzi yango. Ezali biso te; ezali Ye. Bisó tozali kaka basángoli na yango, kasi makambo nyonso ezali ya biso. Bongo soki bózalaka wana mokolo yango, ntango Simona akómaki wana? Mpe, bino, moto moko te. . . Oyo nde likambo ya liboso oyo Atikálá mpenza kosala.

108 Sikawa, yango nde ekozala likambo ya liboso mpo na bato oyo, soki Asali yango. Bamóná naino yango te liboso.

109 Kasi ntango Simona akómaki wana, mobangé molóbi mbisi, akótaki mpenza na kelasi te, mpe ayebaki kokoma nkombo na ye na lokasa te. Biblia elobaki ete azalaki “moíngá mpe atángá te.” Mpe ezali likangisi. Nyonso mibale, “moíngá mpe atángá te.” Na bongo ntango Akómaki wana, na elembo, makasi. . . Yesu, Yesu alobaki: “Nkombo na yo Simona.” Bokanisi ete ye akanisaki eloko nini? Bolingaki kokanisa eloko nini soki bozalaki wana? “Mpe nkombo ya tata na yo ezali Yona. Mpe kobanda lelo bakobenga yo Petelo.” Bo—bolingaki kokanisa eloko nini? Moto yango azalaki nde kotánga makanisi na ye? Ee, bolingaki kokanisa nini? Bolingaki kokanisa ete oyo wana ezalaki elembo ya Masiya?

110 Soki yango ezali elembo ya Masiya na eleko moko, esengeli kozala elembo ya Masiya, na eleko ya mibale, na eleko ya misato, na eleko ya minei. Bileko nyonso esengeli kozala ndenge moko, mpo Nzambe akoki kobóngwana te. Mpe bato boni bayebi ete Masiya azalaki Nzambe? Na ntembe te. Azalaki Mopakolami. Na ntembe te. Boye, Akoki kobongwana te. Asengeli kozala ndenge moko.

<sup>111</sup> Yango wana Asengelaki kotátola likambo yango moko epai ya Basamalia, likambo oyo Asalaki epai ya Bayuda. Mpamba te, mabota misato ya bato ezali mabota ya Hama, Semi, ná Yeféte; Bayuda, Mabota ná Basamalia.

<sup>112</sup> Sikawa, bomoni Molimo Mosanto? Bato boni bayebi ete Petelo azalaki na mafungola ya Bokonzi? Bomonaki yango? Afungolaki yango Mokolo ya Pantekote, epai na Bayuda. Filipe moto akendeki koteya epai ya Basamalia, mpe abatisaki bango na Nkombo na Yesu Klisto, kasi Molimo Mosanto ekitaki naino likoló na bango te. Basengélaki kobéngisa Petelo, oyo atiéláki bango maboko mpe bazuaki Molimo Mosanto. Ezali bongo? Mpe ndako ya Koloneli, bato ya—ya Mabota bazuaki Yango. Ezalaki nyonso wana. Kobanda wana, efungwámi na bato nyonso sikawa. Boye, yango wana mpenza, bomoni, Asengelaki kofungola yango. Nzambe azalaka na lolenge ya kosala makambo.

<sup>113</sup> Sikawa, na ntongo oyo, soki Moto Oyo apésaki Elaka na Mombóto, mpe soki momboto yango efandi awa...Nalingi kondima ete bino nyonso bozali yango. Soki Momboto yango efandi awa, na ntembe te Momboto yango ekomona Elaka yango. Sikawa, moko na moko na baoyo batelemi awa mpe batómbolaki maboko, baoyo bayá naino ata na mayangani te. Ngai nayebi bango te. Nayebi ata moko na bango te. Bauti na bango kokóta awa. Mpe eleki mwa ntango, Billy apesaki bango ba-kálati ya mabondeli, mpe bango oyo batelemi awa. Bato mingi kati na bino kuna, botómbolaki maboko, oyo bozui ba-kálati ya mabondeli te, mpe bozalaki kaka bapaya awa. Oyo wana etali yango ata moko te. Ndima kaka ete ozali mosangoli ya elaka yango. Ndima kaka ete na mapipi na Ye osilá kobikisama. Mpe ndima yango na motema na yo mobimba, mpe tálélé Ye.

<sup>114</sup> Eloko bobele moko oyo likabo oyo esalaka, ezali kaka komípesa epai na Ye. Ngai nalobaka eloko moko te; Ye nde alobaka. Mpe soki Ezali Molimo na Ye ya lisakoli, mosakoli azalaki ntango nyonso na YANGO ELOBI NKOLO. Ezalaki ntango nyonso solo. Mpe ezali likambo ya Mateyo te, mpo ekosengela kolóngobana na Biblia, soki ezali Nzambe. Nzambe akoki te koloba likambo moko, na nsima, kozóngela yango, mpe kobóngola yango. Esengeli kozala ndenge moko ntango nyonso.

<sup>115</sup> Sikawa, bino baoyo bofandi kuna, bóndima. Ná nyonso oyo ezali kati na bino, bóndima. Sikawa bóningana lisusu te. Bófanda kaka kimia sikawa, bino nyonso.

Malembe-malembe mpe na bopolo nyonso mpenza.

Na ntongo oyo, esalemi ete moto ya liboso oyo ateleme awa azali mobali. Sikawa tokozua Likomi oyo.

<sup>116</sup> Sikawa bozali komona esika nini natélemi? Bato boni bakoki kosósola yango? Bótala mibali mpe basi oyo batelemi awa, oyo natikálá komona te na miso na ngai, na bomoi na ngai. Batikálá



kutu kozala te na mayangani, mpe bozali komona esika nini batelemi. Bayebi te eloko nini ekosalema. Nayebi te eloko nini ekosalema. Kasi Nzambe alakáki yango. Abraham ayebaki te eloko nini elingaki kosalema, ntango abimisaki mbeli mpo na koboma Yisaka, kasi Nzambe apesaki ye elaka. Yango ekataki likambo. Azuáká ye lokola moko longwa na bakufi, ayebaki ete Azalaki na makoki ya kosékwisa ye longwa na bakufi. Boye te? Boye yango ekáti likambo.

117 Sikawa, mobali oyo ateleme mpembeni na ngai, namóná ye naino te, nayebi eloko moko te na ntina na ye. Toyebani te. Bisó mibale toyebani te. Nzambe nde ayebi bisó mibale.

Sikawa, na nzela na likabo ya Nzambe, soki nakoki, na nzela ya likabo. . . Sikawa, makabo yango babótamaka na yango. Nzambe abongísá yango liboso, liboso na kozalisama ya mokili. Bato boni bayebi yango? Boye, ezalaki na likambo moko te, oyo ngai nasála, mpo na kozua likabo yango. Nzambe aponáki yango. Ngai naponá yango ata moke te. Ye nde aponaki yango. Bomoni? Lokola basakoli ya Kondimana na Kala, ná bato ndenge na ndenge, babongisámáká liboso mpo na kosala yango, mpo na kosala boye.

118 Sikawa, soki moto yango azali na bokono, nakoki kobikisa ye te. Soki moto yango azali na bosenga, ekotálela bosenga nini azali na yango, mpo na koyeba soki nakoki kosunga ye to te. Ntango mosusu, soki ezalaki eloko moko to mosusu, lokola ye. . . eloko moko ya moke, oyo nakokaki kosunga ye na yango, ee, nakosepela kosala yango. Ntango mosusu azali moto ya nkanda. Ntango mosusu azali ata Moklisto te. Ntango mosusu azali Moklisto. Ntango mosusu azali mokosi. Ngai nayebi te. Bongo soki ayei awa na mayele mabe mpo na kosala mabe, soki amikotisi awa, mpe akómi kino awa, mpe azali lokola kobómbo likambo moko? Bótala malamú eloko oyo ekosalema, bomoni, bótala bobele—bobele eloko oyo ekosalema. Ngai nayebi te.

119 Kasi, bomoni, oteleme awa, na nsima okoki mpenza kondimisama, koyebáká ete Nzambe nde apesaki elaka, Nzambe akokisaka elaka na Ye. Bomoni? Sikawa, soki Nzambe akokisi elaka na Ye, na kati, awa sikawa, mpo na bato oyo; bato boni oyo bazali kuna, oyo bafandi kuna, bokondima yango na motema mobimba? Bokondima na motema mobimba? Na bongo bóndima ngai kaka.

120 Sikawa tótala naino. Tózua Likomi moko. Sikawa, Simona Petelo ayáki epai ya Nkolo Yesu. Mpe kaka ntango akómaki epai ya Nkolo Yesu, Nkolo Yesu ayebisaki ye nani ye azalaki, mpe—mpe ayebisaki ye makambo ya bomoi na ye. Ee, Yesu yango moko azali na bomoi lelo. Ye. . . Bondimi ete Asékwaki na bakufi? Bondimi ete Molimo ya Masiya yango ezali na bomoi kati na Lingomba, lelo, kaka ndenge Esálaka ntango nyonso? Malamú.

<sup>121</sup> Sikawa, bino baoyo bozali na eyanganelo, oyo bozali na ba-kálati ya mabondeli te, bótala awa mpe bóloba: “Nkolo!” Na ntembe te, ba-kálati ya mabondeli ezali te na eyanganelo, Nazali na bango nyonso oyo batelemi awa. Bino baoyo bozali na eyanganelo bóloba: “Nkolo, Ósimba ngai.” Bokomóna likambo oyo ekosalema. Bokomona likambo oyo ekosalema. . . ? . . .

<sup>122</sup> Sikawa, mésie, soki nazalaki na lolenge moko boye na mokili mpo na kosunga yo, nalingaki kosala yango. Bomoni, nazali kaka, toyebani te awa, mpe na—nakutani na yo mbala ya liboso. Kasi nazali na mokumba, lokola motei, ya koloba Solo mpe kozala motatoli ya Yesu Klisto. Mpe, sikawa, nalingi te ete óyebisa ngai eloko moko. Nalingi kaka ete óyanola ngai soki ezali solo to te, na nsima, tika Ye ásala yango. Mpe soki Asali ndenge moko awa na etumbelo, na nzela na nzoto oyo, ndenge Asalaki na nzela na nzoto ya Yesu!

Wana ezali Nzambe, kati na Klisto. Yesu alobaki: “Nasalaka eloko moko te soki Tata, oyo azali kati na Ngai, alakisi Ngai yango te. Ye nde ayébisaka Ngai eloko ya kosala.” Boye, Yesu moto asololaki na mwasi yango te. Ezalaki Tata, na kati na Ye, nde asololaki na mwasi yango. Ezalaki—ezalaki Yesu te nde ayebaki nani Simona Petelo azalaki, ezalaki Tata oyo afandaki kati na Ye, nde ayebaki nani Simona Petelo azalaki. Yango mpenza. Bomoni? Yango oyo.

<sup>123</sup> Nakoki koyebisa yo, sikawa, ozali Moklisto, iyo, mésie, mpo ozali na—na molimo moko ya boyambi, ezali koningana na móto mpenza. Mpe, ye, azali mondimi. Azali Moklisto. Mpe ozali na bokono ya ba-nerf oyo ezali kopesa yo mpasi na estomá. Boye te? [Ndeko alobi: “Ya solo.”—Mok.] Bomoni? Bomoni? Sikawa, ezali bongo. Esalemi ndenge nini? Nayebi yango ndenge nini? Nakokaki mpenza koyeba yango ndenge nini? Totikálá komonana te liboso. Ezali solo. Boye te? [“Ezali solo.”] Ntango mosusu Akoyebisa yo likambo mosusu na ntina na yo moko. Yóka. Likambo mosusu yango oyo. Namoni mwasi moko mpembeni na yo. Azali elongo na yo. Azali mwasi na yo. Ye mpe azali na bosenga ya lisungi moko boye. Iyo, misie. Ondimi ete Nzambe akoki koyebisa ngai awa mpasi ya mwasi na yo? [“Nayebi ete Akoki.”] Malamu, misie. Azali na bokono ya motema, mikakatano. Ya solo. Boye te? Motema likolólikoló, mpe. Iyo, misie. Sikawa, bofándaka na engumba oyo te. Bokozónge epai *boye* ntango bokozónge epai na bino, bokokende na Cincinnati. Ya solo. Bouti na Cincinnati, na Ohio. Nkombo na yo ezali Milliken. Zónge na yo, zónge ndako, mpe bíkísáma. Nkolo ápambola bino mpe bokobíka, yo ná mwasi na yo. Nzambe ápambola bino.

Yaka, mésie. Ondimi? Sikawa zala kaka na kondima. Kotia ntembe te.

<sup>124</sup> Sikawa bózala mpenza na limemia. Bino nyonso sikawa

bózala mpenza na limemia, bófanda kimia. Bomoni, Molimo Mosanto azalaka nsóni-nsóni mingi. Bato boni bayebi yango? Mpenza nsóni-nsóni, Molimo Mosanto, bomoni, kaka mwa bokati moko ekotungisa Ye.

<sup>125</sup> Kokokana na minganga, osengeli kokufa mbala moko, ná bokono ya motema. Ya solo. Oyáki awa kouta na Chicago, M. Mosley. Prénom na yo ezali Théodore. Ondimelaka Nzambe? [Ndeko alobi: “Iyo.”—Mok.] Na bongo, zóngá na ndako mpe zalá na bomoi, na Nkombo na Yesu Klisto, mpe bikisama. Nzambe ápambola yo.

<sup>126</sup> Ondimi Nzambe? [Ndeko mwasi alobi: “Na ntembe te. Iyo, misie.”—Mok.] Ozali na mpasi na lokolo na yo. Yo mpe ofandaka na engumba oyo te. Outi na Owensboro, na Kentucky. Nkombo na yo Mme Lamb. Zóngá na ndako mpe bikisama.

<sup>127</sup> Mwasi oyo afandi wana, ye mpe auti na Owensboro. Ozali na tofina na mabéle na yo awa. Basengelaki kopasola yo, lobi. Zonga, ndima, mpe zalá na bomoi.

<sup>128</sup> Ondimi, misie? [Ndeko alobi: “Iyo, nandimi.”—Mok.] Toyebani te. Nkombo na yo M. Gilmore. Ezali solo. Outi na Anderson, na Indiana, epai koningana monene ya Eglise de Dieu ezali kosalema. Ezali solo. Otelemi awa mpo na mwana na yo ya mwasi oyo abétami na ngámbo moko. Azali na paralysie ya ngámbo moko. Ondimi? Na bongo, zóngá na ndako mpe kúta ye ndenge ondimi yango. Malamu. Nzambe ápambola yo. Zalá na kondima. Ndimá.

<sup>129</sup> Ondimi na motema mobimba, misie? [Ndeko alobi: “Iyo, misie.”—Mok.] Outi na Indianapolis. Ozali motei ya Nsango-malamu. Oyo wana nde mwasi na yo. Iyo. Ye mpe azali na bokono. Azali na mpasi ya oesophage na oesophage na ye. Monganga . . . Azali na mpasi ya motema; ná mwa motema likoló. Namoni ete ayokaka te na litoi na ye. Nini . . . Yaka awa.

Yo molimo ya kokufa matoi, na Nkombo na Yesu Klisto, napámeli yo na nzela na Nzambe na bomoi, bimá kati na mwasi oyo.

Sikawa, okoki koyóka ngai malamu sikawa. Bino mibale bokoki kozóngá na ndako mpe bóbikisama. Zonga na ndako na yo. Ozali koyoka ngai, mpe okómi malamu. Okokóma malamu.

<sup>130</sup> Ondimi na motema mobimba? Zalá kaka na kondima epai na Nzambe. Ndimá.

<sup>131</sup> Arthrite ná eloko nini oyo, ezali mpenza maladi mabe. Ondimi ete Nzambe akobíkisa yo? Na bongo, kita kuna. Zóngá na ndako, wana ozali kosanzola Nkombo na Ye, koloba ete: “Natondi Yo, molingami Nkolo Yesu.”

Ntina oyo nazuaki yango noki-noki ezali mpo mwasi oyo mpe azalaki na yango, arthrite.

Ondimi ete Nzambe akobikisa yo? [Ndeko alobi: “Iyo.”—Mok.] Malamu, misie. Na bongo kende kaka kuna, mpe loba: “Natondi Yo, Nkolo Yesu,” mpe zonga na ndako.

<sup>132</sup> Malamu, ndeko mwasi, baluka mpe zonga, mpe ndima. Mabólóngó na yo ezali kokangama, awa, ozali mpe na mpasi ya motema, mpe bongo na bongo. Baluka kaka mpe zonga na ndako, loba: “Natondi Yo, Nkolo Yesu,” mpe míyóka malamu. Ndima ná nyonso oyo ezali kati na yo.

<sup>133</sup> Ondimi? Bongo bino kuna, bamosusu kati na bino, bondimi?

<sup>134</sup> Mama-moke oyo afandi kuna, oyo azali na suki ya moindo, oyo azali na maladi ya ndeke, ondimi ete Nzambe akobikisa yo? Oyambi yango? Malamu. Soki olingi, Akosala yango.

<sup>135</sup> Motei moko afandi awa, afandi awa, azali na mposa ya kotambola pene na Nzambe koleka. Boye te, misie? Ondimi ete Nzambe akosala yango mpo na yo? Tómbola loboko mpe loba: “Nayambi yango.” Iyo.

<sup>136</sup> Madame oyo afandi awa, oyo auti kokitisa loboko. Azali na mpasi ya molimo, azali kokanisa yango. Ezali solo.

<sup>137</sup> Mama moke moko azali awa, azali komituna soki akobóta mwana na ye. Ezali solo. Osilá kozala na moko na mayangani na ngai. Nalakáki yo mwana, na nzela na Nzambe. Boye te? Malamu. Na bongo zonga na ndako mpe zuá ye. Komitungisa lisusu mpo na yango te.

<sup>138</sup> Bondimi na motema mobimba, bino nyonso? Bino nyonso bóndimi? Momboto ya Abraham akobótola ekuke yango, ekuke ya moyini. Ozali Momboto ya Abraham, na nzela na Yesu Klisto? Tombola maboko soki ezali bongo.

Na bongo tiá maboko likoló na moninga na yo, likoló na moninga na yo, bamoko likoló na bamosusu. Bótia maboko bamoko likoló na bamosusu. Bóbotola ekuke sikawa. Ekómi ya bino. Ezali ya bino. “Libondeli ya kondima ekobikisa babeli. Nzambe akotelemisa bango.” Malamu, bóndela na ndenge na yo. Bóndela ndenge bobóndelaka na losambo na yo. Bóndela mpo na bato oyo bazali elongo na yo sikoyo. Bótia maboko bamoko likoló na bamosusu mpe bóbondela.

<sup>139</sup> Nkolo Yesu, toyei na Nkombo ya nkembo mpe ya Nguya nyonso ya Momboto Mokonzi, ya Momboto ya Abraham, Oyo alakamelaki ye likoló na ngomba oyo Opesaki mwana-mpate; mpe Otiaki mwana-mpate yango na lisobe, likambo ya kokamwa, ndenge Osalaki mpo na biséndé wana, lobi.

Nabondeli, E Nkolo Nzambe, ete Ótinda nguya, kondima. Mpe tika ete Momboto nyonso. . . Nayebi ete bakosala yango, Nkolo, mpo Olobaki: “Momboto ya Abraham.” Mpe soki bato mosusu bazali awa oyo bazali koloba ete bazali Momboto, kasi bazali Momboto te, limbisa bango mpo na likáni, to bilobéla na bango awa. Mpe tika ete Molimo Mosanto átia sikawa móto na

milimo na bango ná kondima oyo ya bomoi. Tika ete Molimo Mosanto ákota na motema moko na moko mpe ábíkisa moto nyonso oyo azali awa. Batii maboko bamoko likoló na bamosusu.

Momboto Mokonzi alobaki: “Bilembo oyo ekolanda baoyo bakondima. Soki batieli babeli maboko, bakobika.” Mpe Ye oyo apesaki elaka yango azali awa sika-sikawa, Azali komitalisa ete Azali awa. Momboto yango, bango oyo, ná maboko ya bamokolo likoló na bamosusu. “Bilembo oyo ekolanda baoyo bakondima.” Tika ete Molimo Mosanto ásopana na moko na moko na maboko na bango, kino na kati ya mitema ya bato, na kati ya banzoto, mpe ábíkisa mobeli nyonso oyo azali Liboso na Nzambe. Kokisa yango, Nkolo.

Napámeli zábolo. Napámeli kozánga-kondima nyonso. Napámeli molimo mabe nyonso. Napámeli bilobélá nyonso. Napámeli nyonso oyo ekesani na Liloba na Nzambe. Mpe tika ete Molimo Mosanto ázua esika na Ye na kati ya mitema ya bato, sika-sikawa, na nzela ya kondima. Tika ete bokono nyonso mpe maládi nyonso, mpasi nyonso étika bato, na Nkombo na Yesu Klisto. Amen.


<sup>140</sup> Sikawa, Momboto ya Abraham, bino baoyo bozali bakitani ya bokonzi, bino bato ya elaka, na nzela ya ngolu mpe lisungi ya Nzambe, bato boni kati na bino bakoki kotómbola loboko, koloba: “Nasili kozua eloko oyo naséngaki”? Matondi. Ezali yango. Yango nde ntina ya elaka yango. Yango nde ntina oyo elaka yango epesamaki, mpo bókoká kozala basángoli ya biloko nyonso, na nzela ya Yesu Klisto Oyo abíkisaki bino. Abíkisaki bino na masumu. Abíkisaki bino na bokono. Abíkisaki bino na kufa. Abíkisaki bino na ewelo. Abíkisaki bino na nkunda.

<sup>141</sup> Okoloba: “Ndeko Branham, kasi biso nyonso tokokóta na nkunda.” Kasi nkunda ekoki kokanga biso te. Ye mpe akendeki kuna, kasi ekokaki kokanga Ye te. Ya solo mpenza. Ekoki kokanga Ye te.

<sup>142</sup> “Ee, Ndeko Branham, ngai nazalaka na masénginia mingi.” Ye mpe azalaki na yango. Kasi Abíkisaki yo na masénginia.

<sup>143</sup> “Sálisa biso ete tókweya na masénginia te, kasi bíkisa biso na mabe.” Bomoni, Ye moto asálaki yango. Nyonso wana ekómi ya yo. Nyonso ezali ya yo, na nzela na Yesu Klisto. Apesi yo biloko nyonso, ofelé. Eloko ya kofuta mpo na yango ezali te, to eloko moko te. Ekómi kaka ya bino sikawa. Bozali na esengo mpo na yango te? Bozali na esengo mpo na Ye te? Matondi ézonga epai na Nzambe.

<sup>144</sup> Sikawa, mayangani ekozala, na mpokwa ya lelo. Iyo. Ekozala na mpokwa ya lelo, na ngonga ya nsambo na ndambo na mpokwa. Nakotika ete mokengeli áyebisa bino. Yaka. Yaka.

Sikawa, na ntongo ya Lomingo ekoya, soki Nkolo malamalu alingi, nakoya lisusu kobóndela mpo na babeli, na tabernacle, to na esika nyonso. 

59-1108 Kobótola Bikuke Ya Moyini  
Branham Tabernacle  
Jeffersonville, Indiana U.S.A.

LINGALA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyikanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)